

LESSON 4

*January 20 – 26

Topa in Za-in Hong Honkhia



SABBATH NITAAK

Tu Kaalsung Simding: Late 139:1–18; 121; 17:8; Matt. 23:37; 1Kor. 10:1–4; Heb. 4:15, 16.

Kamngah: “Huhna a ngen dingin thumaan mite a kiko ciangin, Topa in za a, a haksatna khempeuh panun amaute a honkhia hi” (Late 34:17).

Late sungah Topa in na khempeuh tungah ukna khempeuh nei ahnhna thu pulaak phapha hi. Amah in nate piangsakin, nate a kem Pasian ahnhna thu, Amah mah in Pasian ahnhna hong hilh hi. Amah in A mite tawh kizopna a hong bawl masa hi. A mite kisap na khempeuh a hong sik hi. Pasian in a mite tawh kinai takin hong om hi. A bawlsa nate tawh kinai takin hong om hi (Late 73:23, 25).

Amah in “Vantung om hi mah taleh (Late 103:19) meite tungah a tokhom koihin om (Late 68:4) hi mah taleh thuman sungah Amah a sam mite tawh kinai takin hong om Pasian hi (Late 145:18). Late sungah Topa in thuman thutang in a nungta Pasian ahnhna hong hilh hi. Amah in amah a sam mite kisapna khempeuh a sepsak hi (Late 55:16–22). Late sungah nuntak khuasakkzia ding a hong hilhna mun tampi-ah kimu thei hi. Tua thute in Pasian tungah thungetna le Ama tungah thungen mi khempeuh za lo-in a om kei hi. Amah sungah upna tawh Ama kiang naitakin i om thei hi. Ama thupiakte bangin nungta-in i kalsuan ding hi. Upna le Ama thupiakte bangin i nuntakna in Ama san tham cing nunzia ahnhna kimu thei hi. Israelte tangthu ungtawnin hih thu kimu thei hi.

*January 27, Sabbath a ding kiginkholhna in tu kaal lesson sim in.

Ka Nuntakna-in Na mai-ah Kisello Hi

Simin, Late 139:1–18. Koi bangin hih thu in Pasian vangliatna pulaak hiam? (*Late 139:1–6*), Ama ompihna (*Late 139:7–12*), Ama hoihna (*Late 139:13–18*) pulaak hilo hiam? Pasian kamciamte in Ama vangliatna pulaak hiam?

Huhna kisam mi khat na huhkha ngei hiam? Mi kimkhat in itna le deih sakna tawh a huh mi omding hi. Ahi zongin Pasian in theihna kicing nei ahih manin i tangsapna, i dinmun a hong theihlo omlo hi. Ama kamciamte in kitangsap nate panin hong honkhia bekthamlo-in khamuanna hong guan hi. Late gelhpa in nu' gil sung pan nuntakna hong kipatkhat theihna thu in Pasian vangliatna hi-in, Amah in i nu hong paai lai pek panin hong mu khin hi, a ci hi. Pasian mai panin kuamah kiselcip theilo iihna zong honghilh hi (*Late 139:13, 15*). Pasian in na khempeuh thei hi (*Late 139:2*), i lungsim khempeuh zong thei hi (*Late 139:2, 4*), vankhua-a om khempeuh zong thei hi (*Late 139:3*); mihingte nunzia khempeuh zong hongthei hi. Pasian in eite hong thei hi, cih thu in eite lau nading hilo-in Amah kiang naizaw dingin hong deihna hizaw hi. Singlamteh tunga a nuntakna hong piakhia Pa in Zeisu tawh naitakin i nuntak ding hong deih hi. Zeisu sungah upna tawh dikna hong kipia khin hi; Pasian mahmah in Ama dikna thutanna hongpia khong zo hi (*Rom 3:5, 21*).

Pasian ompihna in na khempeuh huamkhin ahihna le Ama vangliatna in hell (*sheol: hankhuk*) khuamial tungah zong ukna nei Pasian hi, ci-in honghilh hi (*Late 139:8, 11, 12*); mun le mual in ciangtan theilo hi (*Late 56:13*). Ama hong ompihna in “leimong khat pan leimong dongah” “Ni suahna pan ni tumna dongin” kizel hi (*Late 139:9*). Hih limciinnate in bang pulaak hiam? Vankhuanuai-ah Pasian vangliatna in a tuam khakloh omlo ahihna, na khempeuh mun khempeuh ah Pasian vangliatna kimu thei ahihna honghilh hi. Na khempeuh piangsak bekthamlo-in na khempeuh a kemcing Pa Pasian hi (*Heb. 1:3*).

I nunzia khempeuh hong thei Pasian in honghuh hi; hong bawlpha hi. Hih thu phawk thakna in Ama liatna pulaak hi-in phatna le muanna thak hong neisak hi. Late gelhpa in a nuntakna sung panin Pasian puahna ngah dingin akiphal hi. Tua bangin Amah tawh naitakin kizopna a nei hi.

Mi kimkhat ngaihsutna-ah Pasian in na khempeuh mu-in thei ahih manin, khuamial sung a om khempeuh zong mu ahih manin lau-na tawh kidim tawntung uh hi. Tua hi-in bang hangin hotkhiatna thu in lametna phungpi hong suak thei hiam?

Pasian hong Kepna-ah Khamuanna

Simin, Late 40:1–3; 50:15; 55:22; le Late 121. Bangci bangin nisim nuntak khuasakna-ah Pasian hong ompihna kimu thei hiam?

Lai Siangtho in Topa Pasian in Amah a sam mite adingin nasem hi, ci-in honghilh hi. Late gelhpa in “Topa in a tawntung in ka mai-ah a om hi,” ci hi (*Late 16:8*). Tua ahih manin amah in Pasian a muang thei hi. A kitangsapna khempeuh Ama tungah a suankhia thei hi (*Late 7:1; 9:10*). “Mawhna dum thukpi sung ah lamet bei-in om hi mah taleh a Topa a sap ciangin Topa in amah a honkhia hi (*Late 130:1, 2*); Topa om lohna mun cih omlo hi; Ama omlohma munah nuntakna omlo hi. Late gelhpa in bangzah in dongtuahna phukha himah taleh, lamet bei-in om ngeilo hi; gimna sungah nungta himah taleh lamet bei cih om ngeilo hi. *Late 121* in a pulaak bangmahn Piangsak Pa vangliatna in Ama sungah upna mi tungah thuman citak tawntung hi. Tua vangliatna sungah: [1] “Amah in na khe a talsak kei ding hi” (*Late 121:3*). Khe cih kammal in limcinna nei a, mihing khat ii nuntakna a pulaak kammal in kizangh hi (*Late 66:9; Late 119:105; Pau. 3:23*). Hebrew kammal ah “*kin*” cih kammal in Pasian in leitung mite (*Late 93:1-3*) le Zion (*Late 125:1*) tungah a piak bitna a pulaak kammal hi.

[2] Topa lim le meel in siat theihna a lau-huaite panin Israel mite a kembit hi. Amah in lusu lo-in ihmhu lo hi. Topa in tatsat lo-in A mite huh dingin a kiging tawntung hi (*Late 121:3, 4*).

[3] Topa in “*kidalna luum*” (*Late 121:5, 6*). Egypt panin Israel mite a paikhiatpih lai-in suunin meilum, zan ciangin meiikuam tawh makaih hi (*Pai. 13:21, 22*). Topa in A mite kitangsap nate, taksa kisapna, lungsim kisapnate a pia hi; Amah in a mite bitna buk hiding hi.

[4] Pasian in a mite taklam khut hi (*Late 121:5*). Topa taklam khut in mi khat adingin a thahatna bel hi-in, a khut tawh nasepna lian bel hi (*Late 74:11; 89:13*). Hih munah Pasian tawh kinai-na, le Ama maipha ngahna hi (*Late 16:8; 109:31; 110:5*).

[5] Pasian in a mite kemin siatna panin a dal hi (*Late 121:6–8*). “Sun” le “zan” a gimnate a tuakkha kei uh a, amaute sungtum pusuhna khempeuh ah kem hi. Hihin Pasian vangliatna, kicinnate a pulaak kammal hi. Itna tawh kidim Pasian muanna le kepna sungah nuntak khuasakna honghilh hi. Eite in zong tua bangin a nungta dingin hongdeih hilo hiam?

Pasian kepna sungah khamuanna na neithei hiam? Koici bangin Pasian tawh kopin Amah tawh na semkhawm thei ding na hiam?

TUESDAY

January 23

Topa in Lauhuai-na Panin Bukna Bit

Simin, Late 17:7–9; 31:1–3 le Late 91:2–7. Late gelhpa in hamsat a tuah ciangin bangci nuntak hiam?

Late gelhpa in gimna lunggimna tuamtuam phukha-in, a tuah thute hangin Topa kiang vazuan thei hi. Amah in a lauhuai-na panin amaute a huu hi. Na khempeuh tungah ukna nei Topa thei-in Amah muang ahih manin tua bangin Pasian in mun khempeuhah nasem lo hi. Late gelhpa in hih bangin tecipang hi: Topa tungah, “Ka bukna le ka munkip muanhua, ka muan ka Pasian na hi hi,” ci ding uh hi (*Late 91:2*). Hih bangin a pulaak theihna a hang in a beisa huna Topa huhnate a pulaak hi. Tu-in Topa muanna tawh a kalsuan thei hi; mailam hun adingin bangmah patauhna nei nawn lo hi. Late gelhpa in Topa in a sangbelna-ah om vanglian Pasian pulaakin (*Late 91:1, 2*), Pasian liatna zong a phawkkik hi. Late gelhpa in Pasian sungah bitna kingah thei ahihna khamuangin a omthei hi: “mun simtham” (*‘bukna’ ahihkeileh ‘bukna mun’ (Late 91:1)*), *‘khawlna’* *‘kulhpi’ (Late 91:2)*, *‘kha-nuai’* *‘kidalna luum’* *‘siikkual’ (Late 91:4)*, *‘omna mun’ (Late 91:9)*. Hih limciinnate in bang pulaak uh hiam? Late gelhpa in *bitna le bukna* a mu hi. Gam sungah tuucingin a omna-ah suun nisa lakah niliap a ngahnate a phawk hi. Ahihkeileh Israel mite a galte uh kiang panin dalna a ngahnate a phawkkik hi. Tua bangin bitna angahna-ah luum ahihkeileh kulhpite manphatna a pulaak hi.

Simin, Late 17:8 le Matt. 23:37. Hih munah bang limciinna kipulaak hiam? Tua in bang thu pulaak hiam?

Limciinnate khat in “Topa kha nuai-ah bukna mun ngah” (*Late 17:8, 22; 57:1; 63:7*). Hih limciinna in khamuanna le lungmuanna pulaak hi. Vasa nuta in vasa bu sungah nuamtakin a omthei uh hi. Topa kepna nuai-ah bitna a ngah thei uh hi. Topa kepna thu mu in a kha tungah a tano puain in a kha nuai-ah a kem hi (*Pai. 19:4, Thkna. 32:11*); akpi in a tanote a kha nuai-ah a koih bangin Topa in a mite a kem hi (*Matt. 23:37*).

Koi bangin hamsatna pan bitna ngah thei i hiam? Topa kepna i ngah khak loh hun omkha thei mah hi. Bang hangin tua bangin buai-nate i tuah khak ciangin Topa in eite hong ompih lo hi, ci ding i hiam?

Hong Huupa le Hong Honpa

Simin, 1Korin 10:1–4. Koi bangin Paul in Egpyt panin Paikhiatna thu pulaak hiam? Vantung thu bang honghilh hiam?

Simin, Late 114. Koi bangin Pasian in Israel mite Egypt gama saltanna panin a honkhia hiam?

Late 114 in Egypt gam a saltanna pan suahtakna thu pulaak hi. Thuciam Lui khempeuh bekthamlo-in Thuciam Thak sungah Egypt panin suahtakna in Pasian in Ama vangliatna tawh Satan ukna nuai-a om A mite hong hotkhiatna limciing hi. Paul in Korin pawlpite tungah, Paikhiatna thu mah siksan in, Zeisu Khrih sungah hotkhiatna thu a pulaak hi. *Late 114* in vankhuanuai-ah Pasian vangliatna le ukna a pulaak hi. Amah in na khempeuh tungah ukna nei Pa aihhna le saltanna pan a Honkhiapa aihhna a pulaak hi. Amah in Jordan Gunpi kangsakin a mite a paipih hi. Saltanna leitang panin Kanaan zuanin a mite tonpih a, amaute kitangsapna khempeuh a sik hi (*Thkna. 1:44; Josh. 3:14–17*). Topa Pasian in na khempeuh tung a uk hi. Pasian mite in vantung Jerusalem zuan in a paina lampi-ah gimna le lauhuai-na tuamtuam phukha uh hi. Late gelhpa in mualpi mualneute kantanin vantung leitung le na khempeuh a Piangsakpa aihhna thu a pulaak hi (*Late 121:1*).

Late 114 in Zeisu in huihpi tuihualte tungah ukna nei aihhna thu zong a pulaak hi. Tua hi-a, Amah a um mite (pawlpi) in bang mah lau ding omlo hi; bang hanghiam cihleh Topa in na khempeuh tungah zawhna a ngah khin hi; leitung a zo Pa in amah ahi hi (*Matt.8:23–27; Johan 16:33*). Topa in a mite adingin na lianpi a bawl hi. Ama vangliatna hangin leitung mite in Ama mai-ah lau-na tawh kidim hi (*Late 114:7*). Lingin lau-na in mihing in tua bangin lau-na tawh nungta aihhna a pulaak hi (*Late 96:9; 99:1*).

Pasian tawh kopin a kalsuan mi-in bangmah lau ding omlo hi. Lauhuai-na tuamtuam panin Topa' hong kepna hangin Amah tawh kizopna thu bang honghilh hiam? Late gelhpa in a tuahkhak thute bang mahin lauhuai-na tuamtuamte panin suahtakna in bang thu honghilh hiam?

Biakbuk panin Huhna

Simin, Late 3:4; 14:7; 20:1–3; 27:5; 36:8; 61:4; le Late 68:5, 35. Hihte in koi panin huhna hong pai hi, ci-in pulaak uh hiam?

Vantung thute thu gui bel le leitung lauhuai-na panin bukna cihte in biakbuk thu siksanin kipulaak hi, ci-in kimu thei hi. Biakbuk in kisapna neite in huhna a ngahna mun hi; siatna namcin panin bitna mun hi. Tua bekthamlo-in hokhiatna mun hi. Biakbuk in gimna thuakte adingin tawldam ngahna mun zong hi. Pasian in tagah le meigongte kemin a cing Pa ahi hi. “Zion” panin Pasian hoihna le kicinna a kilangsak hi. (*Late 50:2, 19*), Pasian thukhenna in thutangin Topa thupha hong luangkhia hi (*Late 84:4; 128:5; 134:3*). Biakbuk in bitna le khamuanna kingah theihna mun hi. Bang hang hiam cihleh biakbuk in Pasian omna mun hi. A biakbuk in bitna hi lo-in Pasian omna hangin tua bangin bitna kingah thei hi zaw hi. Tua bang mahin Topa omna mual, Zion Mual in mual dang bang lo-in, Zion mual in a siangtho mual hi (*Late 68:15, 16; Isa. 2:2*).

“Eite’ neih Siampi Lianpen pa in i ginat lohna-ah eite a hong hehpih thei lo ding hi lo hi; eite mah bangin ze-etna khempeuh a thuak hi a, ahi zongin mawhna a bawl lo ahi hi. Tua ahih manin a kisap hunin, eite a hong huh dingin hehpihna le dikna thupha i ngahtheih nadingin, kumuanna lungsim tawh hehpihna tokhom va zuan ciat ni.” (*Heb. 4:15, 16*).

Bangci bangin Late gelhpa pulaak biakbuk thu tawh kibatna nei hiam?

Pasian biakbuk siantho-na in mihing in mawhna tawh kidimin Pasian maipha ngah dingin kilawmna bangmah nei lo ihihna a pulaak hi. Tua hi-in Pasian citakna le Ama hong hehpihna bek in mawhna pan suahtakna hong ngahsak hi (*Late 143:2, 9–12*). I nuntakna-ah Pasian maipha ngah theih nading bangmah om lo hi. Pasian mai-ah dikna tawh i om theih nadingin mawhna kisikna le Topa hong hotkhiatna sungah khamuanna i ngah thei hi. Biakbuk in Zeisu sungah hotkhiatna honghilh hi.

Ngaihsutbeh Ding: Ellen G. White, *Patriarchs and Prophets* laimai 195-203 sungah “*The Night of Wrestling*” simin. Jacob thuakna panin bang thu nuntak pih ding na hiam? Jocab tuahkhak thu in thungetna vangliatna honghilh hilo hiam? Pasian sungah bitna honghilh hilo hiam?

Late gelhpa in Pasian sungah upna hong thahatsak thei ahihna honghilh hi. Pasian a muang mite in Ama sungah bukna a ngah thei hi. Ama khut in siatna khempeuh panin a hong kembit thei hi. “Pasian a muang mite adingin Pasian in na lian pipi a bawlsak hi. Hih thu hangin mihind pilna in bangmah hong huh theilo-in Pasian bekmah i muan i suan bel i suahsak ding honghilh hi. Pasian a muanglo mite in Ama vangliatna mu theilo uh hi. Topa in Amah a um mite hamsatna panin huu tawntung hi. Amaute in Topa muanna nei-in Ama tungah citakin Ama thupiak bangin a nuntak uh ciangin Topa vangliatna amu semsem thei uh hi.” —Ellen G. White, *Patriarchs and Prophets*, p. 493.

Late in Pasian kamciamte le tuhun a i tuahkhak thute kilamdanna zong tampi kimu thei hi. Bangbang i tuak zongin Pasian hoihna sungah muanna i neih ding kisam hi. Pasian hoihna lian bel in Singlamteh tung panin hong kilangh hi. Zeisu in Satan mawhsak nate a dawnkikna-ah *Late 91:11, 12* siksanin a dawng hi. Pasian i muan zawh nadingin Pasian zia-etna i telkhialh loh ding kisam hi (*Matt. 4:5–7*) ahikkeileh Pasian deihna tawh kituaklo-in thu kingen kha zel hi. “Khrih pawlpi ahikkeileh Khristian thu-um mite tungah a lian penpen zawhna in siamna le leitung pilna, hauhna liatnate tungtawnin kingah hilo hi. Tua zawnate in Pa Pasian sungah beelin amah muanna tawh kingah thei ahi hi. Lungsim deihna takpi tawh ngenin, upna tawh vanglian Pa khut sungah kingakna hi.” —EG. White, *Patriarchs and Prophets*, p. 203.

Kikupding Dotnate:

① Tuesday ni-a dotna na lawmte tawh kikum in. Late pulaak bangin Pasian kamciamte om himah taleh hamsatna i tuakkha zel a, Pasian muanna ngahin bang hun ciangin siatna sung kikalsuankha thei hiam? Koi bangin hih thute theitel thei na hiam? Koi bangin tua thute tuak kha zel i hiam? Late sungah a lamdang kamciamte kipulaak hiam? Pasian a muang mite in zong gimna thuakin lamet bei-in omkha zel himah taleh Pasian muan veve ding kisam hilo hiam?

② Bangbang i tuak zongin koi bangin na khempeuhah Pasian sungah muanna nei thei ding i hiam? (Gentehma-in *Late 91:14; 143:8, 10; 145:18–20*)? Bang in khamuanna hong lakkhiatsak thei hiam? Banghangin i lungdam hunin Pasian i muan bangin hamsatna hong tun ciangin zong muanna kisam hilo hiam?